

武昌醫館叢書

三一

仲景傷寒補亡論目錄

卷第一

傷寒名例十問

敘論五問

治法大要九問

脈法刺法六問

仲景元化五問

卷第二

仲景辨脈法三十八條

卷第三

仲景平脈法四十五條

卷第四

六經統論二十二問

太陽經證治上九十五條

卷第五

太陽經證治下九十一條

卷第六

陽明經證治八十七條

少陽經證治十一條

卷第七

太陰經證治十條

少陰經證治四十七條

厥陰經證治六十三條

卷第八

不可發汗四十條

可發汗五十八條

卷第九

汗後四十四條

不可吐五條

可吐十條

卷第十

不可下四十七條

可下四十八條

卷第十一

發汗吐下後七十三條

卷第十二

病可溫十三條

病不可灸七條

病可灸八條

病不可刺八條

病可刺二十九條

病不可水十條

病可水八條

病不可火十一條

病可火二條

火邪三條

卷第十三

兩感證五條

陰陽交十一條

三陽合病十五條

結胸二十二條

心下痞二十五條

卷第十四

陽毒五條

陰毒七條

發斑十三條

發黃三十條

卷第十五

瘀血圍血便血證十一條

衄血吐血證十條

傷寒狐惑匿病十條

傷寒百合病十四條 傷寒勞復三十二條

傷寒陰陽易病六條

卷第十六

缺

卷第十七

痙溼暍敘論一條 痙瘓證二十六條

溼病十八條 中暍證六條

霍亂證二十六條 虛煩證七條

卷第十八

傷寒温疫論一條

温病論六條

風温温毒論四條

傷寒相似證論十四條

卷第十九

婦人傷寒證十八條

妊娠傷寒證三十三條

小兒傷寒證十九條

小兒瘡疹上四十七條

卷第二十

小兒瘡疹下十八條

斑瘡癰疹辨一條

仲景傷寒補亡論卷第七

河南郭雍撰次

太陰經證治十條 少陰經證治四十七條

厥陰經證治六十三條

太陰經證治十條

仲景曰脈尺寸俱沈細者太陰受病也當四五日發以其脈布胃中絡於嗑故腹滿而嗑乾龐氏云宜大承氣湯下之雍謂更當詳證而後可下此卽仲景辨太陰之說也未可遽下

又曰太陰之爲病腹滿而吐食不下自利益甚時腹自痛若下之必胸下結鞭雍曰若太陰本證藏寒自利不渴當依仲景溫之以四逆輩若本太陽病因誤下腹痛轉屬太陰者依仲景用桂枝加芍藥湯以太陽誤下表證未解也

又曰太陰中風四肢煩疼陽微陰濇而長者爲欲愈又曰太陰病欲解時從亥至丑上

又曰太陰病脈浮者可發汗宜桂枝湯

又曰自利不渴者屬太陰以其藏有寒故也當溫之

宜服四逆輩

又曰傷寒三日太陽脈弱至四日太陰脈大龐氏云脈大而胸滿多痰者可吐之無此證者宜汗之雍曰吐用瓜蒂散汗用桂枝湯仍須脈浮則可汗也

又曰傷寒脈浮而緩

龐氏云亦大之類

手足自溫者繫在太

陰太陰當發身黃

龐氏云小便不利者必發黃以五苓散加茵陳主之

若小便

自利者不能發黃至七八日雖暴煩下利日十餘行必自止以脾家實腐穢當去故也龐氏云可類要四

味橘皮湯

又曰本太陽病醫反下之因而腹滿時痛者屬太陰也桂枝加芍藥湯主之大實痛者桂枝加大黃湯主之

又曰太陰爲病脈弱其人續自便利設當行大黃芍藥者宜減之以其人胃氣弱易動故也校正云下利者先煎芍藥二沸雍曰以脈弱故知胃氣弱也

少陰經證治四十七條

仲景曰脈尺寸俱沈者少陰受病也當五六日發以其脈貫腎絡於肺繫舌本故口燥舌乾而渴龐氏云

宜大承氣湯雍曰未可也更宜詳餘證可下則下之
又曰少陰之爲病脈微細但欲寐也

又曰少陰病欲吐不吐心煩但欲寐五六日自利而
渴者屬少陰也虛故引水自救若小便色白者少陰
病形悉具小便白者以下焦虛有寒不能制水故令
色白也常氏云可四逆湯甘草乾薑湯

金匱方

又曰病人脈陰陽俱緊反汗出者亡陽也此屬少陰
法當咽痛而復吐利常氏云可豬膚湯雍曰少陰有
伏氣病亦如傷寒法先咽痛次必下利與前證相似

古人謂之腎傷寒其病輕不傳經治法不可同咽痛則半夏桂枝甘草湯下利用四逆湯二三日卽愈

又曰少陰病欬而不利讖語者被火氣劫故也小便必難以強責少陰汗也常氏云桂枝去芍藥加蜀漆龍骨牡蠣救逆湯以救火逆豬苓湯五苓散以通小便

又曰少陰病脈細沈數病爲在裏不可發汗

又曰少陰病脈微不可發汗亡陽故也陽已虛尺脈弱濇者復不可下之雍曰可附子湯

又曰少陰病脈緊至七八日自下利脈暴微手足反
溫脈緊反去者爲欲解也雖煩下利必自愈

又曰少陰病下利若利自止惡寒而蹇臥手足溫者
可治常氏云可當歸四逆湯

又曰少陰病惡寒而蹇時自煩欲去衣被者可治常
氏云吳茱萸湯雍曰凡少陰病煩躁者不可下先服
吳茱萸湯以煩躁非實熱且手足多逆冷也

又曰少陰中風脈陽微陰浮者爲欲愈

又曰少陰病欲解時從子至寅上

又曰少陰病吐利手足不逆冷反發熱者不死脈不至者灸少陰七壯常氏云少陰太谿穴也龐氏云言發熱者謂其身發熱也太谿穴在內踝後跟骨上動脈陷中

又曰少陰病八九日一身手足盡熱者以熱在膀胱必便血也常氏云可桃仁承氣湯芍藥地黃湯

未見方

又曰少陰病但厥無汗而強發之必動其血未知從何道出或從口鼻或從目出是名下厥上竭爲難治常氏云可芍藥地黃湯雍曰仍灸太谿三陰交及湧

泉穴

又曰少陰病惡寒身蹇而利手足逆冷者不治雍曰
灸太谿等穴仍服四逆湯

又曰少陰病吐利躁煩四逆者死龐氏云煩躁者內
煩躁也與吳茱萸湯正宜細審其生死也又曰凡少
陰四逆者宜溫之雍曰此正仲景吳茱萸湯證不當
不治仍灸太谿

又曰少陰病下利止而頭眩時時自冒者死龐氏云
此當是少陽冒昧汗濺然出脈勻小浮者少陰無眩

冒之證雍曰千金翼作少陰

又曰少陰病四逆惡寒而身踈脈不至不煩而躁者

死千金翼同一作吐龐氏詳定云吐利煩躁者死雍

曰吐利煩躁四逆者死已見前證不應重出此正謂

不煩而躁屬利證也更宜吳茱萸湯當歸四逆加吳

茱萸湯仍灸太谿穴

又曰少陰病六七日息高者死

又曰少陰病脈微細沈但欲臥汗出不煩自欲吐至

五六日自利復煩躁不得臥寐者死

又曰少陰病始得之反發熱脈沈者麻黃附子細辛湯主之龐氏曰少陰病脈沈不知何沈也且沈緊發汗則動經沈數爲病在裏不可發汗此脈或沈而濡或沈而微是表中寒而裏不消脈應裏而發在表故以細辛之藥溫散而取汗也

又曰少陰病得之二三日麻黃附子甘草湯微發汗以二三日無裏證故微發汗也龐氏曰謂初得病二三日常見少陰證無陽者須發小汗也

又曰少陰病得之二三日以上心中煩不得臥黃連

阿膠湯主之

又曰少陰病得之一二日口中和其背惡寒者當灸之附子湯主之常氏云當灸膈俞關元穴背俞第三行雍曰此有漏字當是灸膈俞及關元穴也膈俞是背俞第二行穴

又曰少陰病身體痛手足寒骨節痛脈沈者附子湯主之

又曰少陰病下利便膿血者桃花湯主之

又曰少陰病二三日至四五日腹痛小便不利下利

不止便膿血者桃花湯主之

又曰少陰病下利便膿血者可刺常云刺幽門交信
雍曰宜灸

又曰少陰病吐利手足厥冷煩躁欲死者吳茱萸湯
主之雍曰凡少陰病四逆而煩躁者未問其餘證先
宜服吳茱萸湯四逆而無煩躁證者先宜服四逆湯
四逆下利脈不出者先宜服通脈四逆湯此三者治
少陰證大要藥也

又曰少陰病下利咽痛胸滿心煩者豬膚湯主之

又曰少陰病二三日咽痛者可與甘草湯不差者與
桔梗湯龐氏云半夏散亦主之

又曰少陰病咽中痛半夏散及湯主之

又曰少陰病咽中傷生瘡不能語言聲不出者苦酒
湯主之

又曰少陰病下利白通湯主之

又曰少陰病下利脈微者與白通湯利不止厥逆無
脈乾嘔煩者白通加豬膽汁湯主之服湯脈暴出者
死微續者生

又曰少陰病二三日不已至四五日腹痛小便不利
四肢沈重疼痛自下利者此爲有水氣其人或欬或
小便利或下利或嘔者眞武湯主之雍曰眞武湯不
愈者小青龍湯

又曰少陰病下利清穀裏寒外熱手足厥逆脈微欲
絕身反不惡寒其人面赤色或腹痛或乾嘔或咽痛
或利止脈不出者通脈四逆湯主之

又曰少陰病四逆其人或欬或悸或小便利或腹
中痛或瀉利下重者四逆散主之

又曰少陰病下利六七日欬而嘔渴心煩不得眠者
豬苓湯主之

又曰少陰病得之二三日口燥咽乾者急下之宜大
承氣湯

又曰少陰病自利清水色純青心下必痛口乾燥者

急下之宜大承氣湯一法用大柴胡雍曰惟口乾燥一證見

熱更當細詳其餘證方敢用

又曰少陰病六七日腹脹不大便者急下之宜大承

氣湯

又曰少陰病脈沈者急溫之宜四逆湯

又曰少陰病飲食入口則吐心中溫溫欲吐復不能吐始得之手足寒脈弦遲者此胸中實不可下也當吐之若膈上有寒飲乾嘔者不可吐也急溫之宜四逆湯

又曰少陰病下利脈微瀉嘔而汗出必數更衣反少者當溫其上灸之脈經云灸厥陰可五十壯常氏云可灸大衝穴雍曰仍灸太谿

問曰自利者三陰證也仲景以自利不渴者屬太陰

渴者屬少陰何也雍曰太陰脾之經也其脈布胃中與胃爲表裏脾本惡溼加以胃中寒故不渴也少陰腎之經也腎屬水故惡燥經中有邪則腎當大燥於是引飲自救故渴也是以太陰無渴證少陰有渴證也

厥陰證六十三條

仲景曰脈尺寸俱微緩者厥陰受病也當六七日發以其脈循陰器絡於肝故煩滿而囊縮龐氏曰脈微緩者囊不縮若外證發熱惡寒似瘧爲欲愈宜桂枝

麻黃各半湯若尺寸俱沈短者囊必縮宜承氣湯下之雍曰厥陰見沈短短命脈下證未具更宜詳下證中下證全則可下

又曰三陰皆受病已入於府可下而已雍曰三陰可下三陽可汗此言其大略也陽之中自有可汗不可汗證陰之中自有可下不可下證故陰陽之中又當各詳其可汗可下而施行之

又曰厥陰之爲病消渴氣上撞心中疼熱飢而不欲食食則吐蚘下之利不止龐氏云可烏梅丸常氏

以有餘證故曰可烏梅丸四逆湯雍曰無厥證者不用四逆消渴下利飢不欲食宜理中湯下利甚者去白朮加附子氣上如奔豚者茯苓桂枝甘草大棗湯吐虵服烏梅丸兼理中丸

又曰厥陰中風脈微浮爲欲愈不浮爲未愈

又曰厥陰病欲解時從丑至卯上

又曰厥陰病渴欲飲水者少少與之愈

又曰諸四逆厥者不可下之虛家亦然常氏曰可當歸四逆湯

又曰傷寒先厥後發熱而利者必自止見厥復利常
氏云可白頭翁湯雍曰白頭翁治熱利此當更審證
冷熱用之

又曰傷寒始發熱六日厥反九日而利凡厥利者當
不能食今反能食者恐爲除中一云消中食以索餅不發

熱者知胃氣尙在必愈恐暴熱來出而復去也後三
日脈之其熱續在者期之旦日夜半愈所以然者本
發熱六日厥反九日復發熱三日并前六日亦爲九
日與厥相應故期之旦日夜半愈後三日脈之而脈

數其熱不罷者此爲熱氣有餘必發癰膿也常氏曰
可服千金漏蘆湯

又曰傷寒脈遲六七日而反與黃芩湯徹其熱脈遲
爲寒今與黃芩湯復除其熱腹中應冷當不能食今
反能食此名除中必死

又曰傷寒先厥後發熱下利必自止而反汗出咽中
痛者其喉爲痺發熱無汗而利必自止若不止必便
膿血便膿血者其喉不痺常氏云喉痺可桔梗湯便
膿血可桃花湯

又曰傷寒一二日至四五日而厥者必發熱前熱者後必厥厥深者熱亦深厥微者熱亦微厥應下之而反發汗者必口傷爛赤雍曰仲景言厥應下之者謂有當下之厥而誤汗也非謂皆可下也故仲景又曰諸四逆厥者不可下然厥病至於發癰疽便膿血應下者不必拘此

又曰傷寒病厥五日熱亦五日設六日當復厥不厥者自愈厥終不過五日以熱五日故知自愈龐氏續云若六日厥者必發熱愈甚仍下利也雍曰此恐論

中語而諸書皆不見若六日厥則知陽氣有餘故知熱愈甚也

又曰凡厥者陰陽氣不相順接便爲厥厥者手足逆冷者是也龐氏曰凡厥通用四逆湯謂其脈浮遲或微或細或沈皆屬裏有寒也雍曰世之論厥者皆不達其源厥者逆也凡逆皆爲厥傷寒所論蓋手足厥逆之一證也凡陰陽正氣偏勝而厥者一寒不復可熱一熱不復可寒傷寒之厥非本陰陽偏勝暫爲毒氣所苦而然毒氣併於陰則陰盛而陽衰陰經不能

容其毒必溢於陽故爲寒厥毒氣併於陽則陽盛而陰衰陽經不能容其毒必溢於陰故爲熱厥其手足逆冷或有溫時手足雖逆冷而手足掌心必暖龐氏謂非正厥皆寒氣之輕者也故可消息汗下或者以此便爲熱厥非也熱厥之熱與寒厥之寒一也傷寒厥陰止論寒厥唯有輕重之異無熱厥也其謂寒熱相勝復五日六日之言謂發熱五日復寒厥深重者後發熱亦深重其寒厥輕微者其後發熱亦輕微此仲景論文本意誤讀者謂手足寒厥深者其內蓄熱

亦深寒厥微者其內蓄熱亦微大非也然則熱厥之證何如曰手足如炭火炮烙或如入湯中是也曰傷寒有此證乎曰雖未之見以理推之陽毒恐有此證人見之未悟其爲熱厥也曰寒熱二厥之論始於何時曰始於素問岐伯曰陽氣衰於下則爲寒厥陰氣衰於下則爲熱厥故陽氣勝則足下熱陰氣勝則從五指至膝上寒也曰經又言足如履冰時如入湯中一證豈寒熱併厥乎曰此爲風痺淫爍陰陽二經俱不足邪氣乘虛而入舍於二經之間往來寒熱正氣

不能與之爭邪氣日進正氣日衰所以不出三年死
非厥也

又問曰厥病發癰膿便膿血何也雍曰毒氣隨三陰
經走下不復可止非發膿癰便膿血則無自而出故
其毒下於表者則發癰膿下於裏者則便膿血以是
知厥亦有可下逐之理免發癰膿便膿血也便膿血
則喉不痺者以毒下也應下之而反汗則口傷爛赤
者以毒下而復上也曰厥陰論寒厥而此皆熱厥何
也素問曰人之傷於寒者則爲病熱寒極則生熱是

爲熱厥也

龐氏曰手足厥冷皆屬厥陰不可下亦不可汗有須下證者謂手足雖厥冷或有溫時手足雖逆冷而手足掌心必暖非正厥也故可消息汗下

龐氏又曰寒熱而厥面色不澤冒昧者當用綿衣包手足令暖溫必大汗而解

龐氏曰有不因大汗下而兩手忽無脈謂之雙伏或一手無脈謂之單伏或利止如此必有正汗急用四逆輩溫之得有汗便安脈終不出者死

仲景曰傷寒脈微而厥至七八日膚冷其人躁無暫安時者此爲藏厥非虵厥也龐氏曰四逆輩冷服之常氏云可當歸四逆湯

又曰虵厥者其人當吐虵今病者靜而復時煩此爲藏寒虵上入膈故煩須臾復止得食而嘔又煩者虵聞食臭出其人當自吐虵虵厥者烏梅丸主之又主久利

又曰傷寒熱少厥微指頭寒默默不欲食煩躁數日小便利色白者此熱除也

龐氏曰宜乾薑甘草湯

欲得食其病

爲愈若厥而嘔胸脇煩滿者其後必便血雍曰熱不
除而便血可犀角地黃湯

又曰病者手足厥冷言我不結胸小腹滿按之痛者
此冷結在膀胱關元也龐云宜灸關元

又曰傷寒發熱四日厥反三日復熱四日厥少熱多
其病當愈四日至七日熱不除者必便膿血常氏云
可桃花湯

又曰傷寒厥四日熱反三日復厥五日其病爲進寒
多熱少陽氣退故爲進也常氏云可四逆湯待其熱

退寒存厥不復熱始可用之雍曰寒多熱少便宜四逆湯少與之

又曰傷寒六七日脈微手足厥冷煩躁灸厥陰厥不還者死常氏云可灸太衝穴

又曰傷寒發熱下利厥逆躁不得臥者死

又曰傷寒發熱下利至甚厥不止者死

又曰傷寒六七日不利便發熱而利其人汗出不止者死有陰無陽故也雍曰汗出不止者死先服防風牡蠣湯以止汗次服甘草乾薑湯以復其陽得厥愈

足溫更作芍藥甘草湯以和之

又曰傷寒五六日不結胸腹濡脈虛復厥者不可下
此亡血下之死常氏云可當歸四逆湯四逆加入人參
湯

又曰發熱而厥七日下利者爲難治常氏云四逆散
又曰傷寒脈促手足厥逆可灸之常氏云灸太衝穴
又曰傷寒脈滑而厥者裏有熱也白虎湯主之

又曰手足厥寒脈細欲絕者當歸四逆湯主之若其
人內有久寒者宜當歸四逆加吳茱萸生薑湯

又曰大汗出熱不去內拘急四肢疼又下利厥逆而惡寒者四逆湯主之

又曰大汗若大下利而厥冷者四逆湯主之

又曰病人手足厥冷脈乍緊者邪結在胸中心下滿而煩飢不能食者病在胸中當須吐之宜瓜蒂散

又曰傷寒厥而心下悸者宜先治水當服茯苓甘草湯卻治其厥不爾水漬入胃必作利也雍曰治厥四逆湯

又曰傷寒六七日大下後寸脈沈而遲手足厥逆下

部脈不至咽喉不利唾膿血瀉利不止者爲難治麻
黃升麻湯主之雍曰服湯已脈終不至瀉利不止宜
服通脈四逆湯

又曰傷寒四五日腹中痛若轉氣下趨少腹者此欲
自利也常氏云可四逆湯散

又曰傷寒本自寒下醫復吐下之寒格更逆吐下若
食入口卽吐乾薑黃芩黃連人參湯主之雍曰竊疑
此湯性寒又乾薑黃連相反若更嘔吐者當服當歸
四逆加茱萸生薑湯及吳茱萸湯

又曰下利有微熱而渴脈弱者今自愈

又曰下利脈數有微熱汗出今自愈設復緊爲未解
雍曰緊爲有寒須溫之宜四逆湯

又曰下利手足厥冷無脈者灸之不溫若脈不還反
微喘者死少陰負趺陽者爲順也常氏云當灸氣海
關元二穴龐氏云凡厥通用四逆湯謂其脈浮遲或
微或細或沈皆裏有寒也

又曰下利寸脈反浮數尺中自濇者必圜膿血常氏
云可桃花湯

又曰下利清穀不可攻表汗出必脹滿雍曰宜通脈
四逆湯

又曰下利脈沈弦者下重也脈大者爲未止脈微弱
數者爲欲自止雖發熱不死

又曰下利脈沈而遲其人面少赤身有微熱下利清
穀者必鬱冒汗出而解病人必微厥所以然者其面
戴陽下虛故也雍曰不解宜通脈四逆湯少與之其
人下利清穀裏寒外熱正通脈四逆證也

又曰下利脈數而渴者今自愈設不差必圉膿血以

有熱故也常氏云可黃芩湯

又曰下利後脈絕手足厥冷晬時脈還手足溫者生脈不還者死雍曰宜通脈四逆湯

又曰傷寒下利日十餘行脈反實者死

又曰下利清穀裏寒外熱汗出而厥者通脈四逆湯主之

又曰熱利下重者白頭翁湯主之

又曰下利欲飲水者以有熱故也白頭翁湯主之

又曰下利腹脹滿身體疼痛者先溫其裏乃攻其表

溫裏宜四逆湯攻表宜桂枝湯

又曰下利讖語者有燥屎也宜小承氣湯

又曰下利後更煩按之心下濡者爲虛煩也宜梔子
豉湯

又曰嘔家有癰膿者不可治嘔膿盡自愈

又曰嘔而脈弱小便復利身有微熱見厥者難治四
逆湯主之

又曰乾嘔吐涎沫頭痛者吳茱萸湯主之

又曰嘔而發熱者小柴胡湯主之

又曰傷寒大吐大下之極虛復極汗出者以其人外氣怫鬱復與之水以發其汗因得噦所以然者胃中寒冷故也常氏云可吳茱萸湯

又曰傷寒噦而腹滿視其前後知何部不利利之則愈常氏云前部不利豬苓湯後部不利調胃承氣湯雍曰噦者胃中有寒不宜更服調胃承氣湯先宜服半夏生薑湯腹滿如故後部不利者小承氣湯微和之

龐氏曰三陽皆有合病凡十四證唯三陰無合病

仲景傷寒補亡論卷第七終

仲景傷寒補亡論卷第八

河南郭雍撰次

不可發汗四十條
可發汗五十八條

不可發汗四十條

傷寒本論曰夫以爲疾病至急倉卒尋按要者難得故重集諸可與不可方治比之三陰三陽篇中此易見也又時有不止是三陰三陽出在諸可與不可中也

仲景曰少陰病脈細沈數病爲在裏不可發汗

又曰太陽病脈浮緊者法當身疼痛宜以汗解之假令尺中遲者不可發汗何以知之以榮氣不足血少故也龐氏云前陽明病脈遲汗出多微惡寒宜桂枝湯不責榮不足蓋尺脈長大而遲此必軟緊而遲不可汗宜小建中湯雍曰桂枝本爲解肌不動經故前陽明證中用之麻黃則發汗動經也常氏云可小柴胡湯雍曰傷寒陽脈濇陰脈弦法當腹中急痛先與小建中湯不差與小柴胡湯二藥可相須用也故龐氏又曰凡脈緊病必無汗唯濡而緊必有汗勿誤行

桂枝宜建中湯也

又曰少陰病脈微不可發汗亡陽故也

一作濡而微弱龐氏

曰汗則厥而煩躁不得眠常氏云可附子湯

又曰脈濡而弱弱反在關濡反在巔微反在上濇反在下微則陽氣不足濇則無血陽氣反微中風汗出而反躁煩濇則無血厥而且寒陽微發汗躁不得眠
雍曰宜與小建中湯

又曰動氣在右不可發汗發汗則衄而渴心苦煩飲則吐水龐氏曰動氣者謂心腹中虛氣動若誤汗者

先服五苓散一服次服竹葉湯朱氏曰凡脈濡弱不可發汗諸動氣在心腹上下左右不可發汗諸脈動數微弱不可發汗皆宜小建中湯煩躁者宜竹葉湯雍曰諸動氣不可發汗者皆宜茯苓桂枝甘草大棗湯

又曰動氣在左不可發汗發汗則頭眩汗不止筋惕肉瞤龐氏曰此爲逆難治先服茯苓白朮散汗止續與小建中湯朱氏同雍曰汗不止筋惕肉瞤者皆亡失津液證不可茯苓湯也

又曰動氣在上不可發汗發汗則氣上衝正在心端
龐氏云李根湯主之朱氏同常氏云可奔豚湯

又曰動氣在下不可發汗發汗則無汗心中大煩骨
節苦疼目運惡寒食則反吐穀不得前一云穀不消化龐氏

云先服大橘皮湯得吐止服小建中湯朱氏同常氏
云可柴胡桂枝湯茯苓湯小半夏湯雍曰大橘皮湯
茯苓湯小半夏湯皆可用以止吐吐止而心中煩骨
節疼惡寒證不去者服柴胡桂枝湯後服小建中湯
又曰咽中閉塞不可發汗發汗則吐血氣欲絕手足

厥冷欲得蹶臥不能自溫龐氏云甘草乾薑湯主之
常氏曰咽中閉塞可小柴胡湯設經發汗吐血者柏

葉艾葉湯

金匱方

氣微厥逆蹶臥者可當歸四逆湯

又曰諸脈得數動微弱者不可發汗發汗則大便難

腹中乾

一云大便難胞中乾

胃燥而煩其形相象根本異源雍

曰宜小建中湯

又曰脈濡而弱弱反在關濡反在巔弦反在上微反
在下弦爲陽運微爲陰寒上實下虛意欲得溫微弦
爲虛不可發汗發汗則寒慄不能自還常氏云可當

歸四逆湯

又曰欬者則劇數吐涎沫咽中必乾小便不利心中
飢煩晬時而發其形似瘧有寒無熱虛而寒慄欬而
發汗蹠而苦滿腹中復堅一作蹠而心痛常氏云可柴胡乾

薑桂枝湯小青龍湯理中丸雍曰脈經以上二證合
而爲一雍謂自欬者之下爲欬者劇證欬者之上爲
不欬未劇之證二證之脈皆濡而弱也欬證裏寒多
宜小建中湯理中丸附子湯微溫之

又曰厥脈緊不可發汗發汗則聲亂咽嘶舌萎聲不

得前雍曰厥陰經緊則引舌與卵故舌卷而囊縮若
緩則舌萎聲不得前故厥脈緊者不可發汗恐其脈
緩也厥脈緊者宜四逆湯緩者宜小建中湯或言宜
白虎小柴胡皆不可用

又曰諸逆發汗病微者難差劇者言亂目眩者死

云一

嚴語目眩
精亂者死命將難全

又曰太陽病得之八九日如瘧狀發熱惡寒熱多寒
少其人不嘔清便欲自可一日二三度發脈微緩者
爲欲愈也脈微而惡寒者此陰陽俱虛不可更發汗

也常氏云可小柴胡湯雍曰亦宜先服小建中湯

又曰太陽病發熱惡寒熱多寒少

千金翼云寒多熱少

脈微弱

者此無陽也不可發汗常氏云可小柴胡湯雍曰亦宜甘草乾薑湯

又曰咽喉乾燥者不可發汗常氏云可小柴胡湯

又曰亡血家不可發汗發汗則寒慄而振常氏云可

小柴胡加芍藥地黃湯

又曰衄家不可發汗汗出必額上陷脈緊急目直視不能眴不得眠常氏云可犀角地黃湯

又曰汗家重發汗必恍惚心亂小便已陰疼宜禹餘

糧丸

本方闕

常氏云只取一味禹餘糧石火煨末服之

亦可雍曰禹餘糧不用石殼此火煨末服則是殼也

又曰淋家不可發汗發汗必便血常氏云可豬苓湯

芍藥地黃湯

又曰瘡家雖身疼痛不可發汗汗出則瘡常氏云可

小柴胡湯瘕者葛根桂枝湯雍曰更詳治瘕門中

又曰下利清穀不可發汗汗出必脹滿雍曰宜溫其

裏後隨證治之

又曰欬而小便利若失小便者不可發汗汗出則四肢厥而逆雍曰設誤發汗宜甘草乾薑湯當歸四逆湯

又曰傷寒一二日至四五日厥者必發熱前厥者後必熱厥深者熱亦深厥微者熱亦微厥應下之而反發汗必口傷爛赤雍曰已見厥陰卷中厥論并問

又曰傷寒脈弦細頭痛發熱者屬少陽少陽不可發汗常氏云可小柴胡湯

又曰傷寒頭痛翕翕發熱形象中風常微汗出自嘔

者下之益煩心中懊懣如飢發汗則致瘥身強難以
屈伸熏之則發黃不得小便灸則發欬唾常氏云可
小柴胡湯桂枝加葛根湯茵陳蒿湯小青龍湯雍曰
各隨證用之頭痛發熱汗出卽小柴胡湯心煩喜嘔
亦柴胡瘥而身強用桂枝加葛根湯不得小便而欬
唾則小青龍湯熏之發黃則茵陳蒿湯也

又曰太陽與少陽併病頭項強痛或眩冒時如結胸
心下痞鞭者不可發汗當刺大椎第一間肺俞肝俞
發汗則譫語脈弦五六日譫語不止當刺期門

又曰太陽發汗因致痙。雍曰前本病云太陽病發汗太多因致痙。

又曰少陰病欬而下利譏語者此被火氣劫故也。小便必難以強責少陰汗也。常氏云可桂枝去芍藥加蜀漆牡蠣龍骨救逆湯。小便難者五苓散。

又曰少陰病但厥無汗而強發之必動其血未知從何道出。或從口鼻或從目出者是名下厥上竭爲難治。常氏云可芍藥地黃湯。雍曰仍灸三陰交湧泉二穴。三陰交難取湧泉尤奇。

王叔和曰冬時發其汗必吐利口中爛生瘡千金翼同
又曰汗出多熱發其汗亦堅雍曰堅字宜作瘥前有
云發汗太多因致瘥也

又曰病人脈數數爲熱當消穀引食而反吐者以醫
發其汗令陽氣微膈氣虛脈乃數也數爲客熱不能
消穀胃中虛冷故令吐也常氏云可與小半夏湯温
中湯

又曰傷寒四五日其脈沈煩而喘滿脈沈者病爲在
裏不可發汗津液越出大便爲難表虛裏實久則譫

語常氏云可麻黃杏仁甘草石膏湯脈沈裏實讖語者調胃承氣湯

又曰傷寒有五皆熱病之類也同病異名同脈異經雖俱傷於風其人自有痼疾則不得同法其人素傷於風因復傷於熱風熱相搏則發風溫四肢不收頭痛身熱常汗出不解治在少陰厥陰不可發汗汗出讖語獨語內煩躁擾不得臥善驚目亂無精治之復發其汗如此死者醫殺之耳

出醫律

朱氏曰風溫不可

發汗宜萎蕤湯雍曰仲景以風溫溼溫爲傷寒四種

壞病難經以溼溫爲五種傷寒皆屬傷寒也餘見風

溫本門

又曰傷寒溼溫其人常傷於溼因而中暍溼熱相薄則發溼溫病苦兩脛逆冷腹滿又胸頭目痛苦妄言治在足太陰不可發汗汗出必不能言耳聾不知痛所在身青面色變名曰重暍如此死者醫殺之耳

出醫

律朱氏曰白虎加蒼朮湯

又曰溼溫多汗其脈陽濡而弱陰小而熱

龐氏曰不當汗而強汗之則津液枯槁而死

可發汗五十八條

仲景曰大法春夏宜發汗龐氏作春宜汗

又曰凡發汗欲令手足俱周時出以絜絜然一時間許益佳不可令如水流漓若病不解當重發汗汗多必亡陽陽虛不得重發汗也

又曰凡服湯發汗中病便止不必盡劑也

又曰凡云可發汗無湯者丸散亦可用要以汗出爲解然不如湯隨證良驗

又曰太陽病外證未解脈浮弱者當以汗解宜桂枝

湯

又曰太陽病脈浮而數者可發汗屬桂枝證

一法用麻黃湯

雍曰麻黃桂枝二湯分惡風惡寒有汗無汗用之如太陽本證龐氏曰惡寒者不當風而憎寒惡風者當風而憎寒皆屬表證

龐氏論桂枝證曰凡桂枝湯證病有常自汗出小便不數手足溫和或手足指稍露之則微冷覆之則溫渾身熱微煩而又憎寒始可行桂枝湯若病者身無汗小便數或手足厥冷不惡寒反惡熱或飲酒後切

不可桂枝湯也此則中風自汗用桂枝湯證又論麻
黃證曰傷寒之脈緊盛而按之澹是也脈浮而緊浮
爲風緊爲寒風傷衛寒傷榮榮衛俱病骨節煩疼外
證必發熱無汗或喘其人但憎寒手足指未必微厥
厥久而復溫掌心不厥此傷寒無汗用麻黃證也

又曰脈緊必無汗設有汗不可誤作桂枝證

仲景曰陽明病脈遲汗出多微惡寒者表未解也可
發汗屬桂枝湯

又曰病人脈浮大問病者言但便鞭爾設利者爲逆

大便鞭爲實汗出而解何以故脈浮當以汗解

又曰傷寒其脈不弦緊而弱弱者必渴被火者必譫
語弱者發熱脈浮解之當汗出愈常氏云可柴胡桂
枝湯渴者五苓散被火譫語者龍骨牡蠣救逆湯
又曰病人煩熱汗出則解又如瘧狀日晡所發潮熱
者屬陽明也脈浮虛者當發汗屬桂枝湯

又曰病常自汗出者此爲榮氣和榮氣和者外不諧
以衛氣不共榮氣和諧故爾以榮行脈中衛行脈外
復發其汗榮衛和則愈屬桂枝湯脈經云病常自汗

出此爲榮氣和榮氣和而外不解此外衛不和也榮
行脈中爲陰主內衛行脈外爲陽主外復發其汗衛
和則愈雍曰二者語小異而理皆通脈經尤明恐本
論爲後人筆削蓋榮氣獨和而衛氣未和也故其病
外不解榮衛二氣本相和共循脈內外而行也今寒
不傷榮而榮氣獨和風反傷衛而衛氣不和則榮衛
不相通不得諧循脈內外而並行是以其外不解也
必復發去衛中所中之邪風然後榮衛諧和而病解
矣所以用桂枝者以桂枝能和衛而不能至榮也所

以不用麻黃者以麻黃俱入榮衛反復動已和無疾
之榮氣使榮衛俱虛俱出而爲汗遂令汗漏不止則
人殆矣此古人解表精微之意因世人疑榮氣和而
外不解之語故詳明之

又曰病人藏無他病時發熱自汗出而不愈者此衛
氣不和也先其時發汗則愈屬桂枝湯證雍曰前證
言榮氣和而反不及衛此證言衛氣不和而不及榮
其實一證也但前證謂常發熱而汗出者此證謂發
熱汗出有時者故論言先其時發汗則愈其用桂枝

則二證皆同

又曰脈浮而緊浮則爲風緊則爲寒風則傷衛寒則傷榮榮衛俱病骨節煩疼可發其汗宜麻黃湯雍曰此榮衛俱傷之證所以不用桂枝

又曰太陽病不解熱結膀胱其人如狂血自下者愈其外不解者尙未可攻當先解外屬桂枝湯外解已血未下少腹急結乃可攻之宜桃核承氣湯

又曰太陽病微喘者表未解也宜桂枝加厚朴杏子

湯

又曰傷寒脈浮緊不發汗因致衄者屬麻黃證

又曰陽明病脈浮無汗而喘者發汗則愈屬麻黃湯證

又曰太陽病脈浮者可發汗屬桂枝湯證

又曰太陽病脈浮緊無汗發熱身疼痛八九日不解表證仍在當復發汗服湯已微除其人發煩目瞑劇者必衄衄乃解所以然者陽氣重故也屬麻黃湯證
雍曰服湯已者謂服麻黃湯已也衄家不可發汗而此用麻黃湯蓋久衄之家既已亡血故不可汗今緣

失發其汗致衄故當瀉其毒氣也

又曰脈浮者病在表可發汗屬麻黃湯

一云用桂枝湯 雍曰

亦分中風傷寒有汗無汗二證而用桂枝麻黃二湯也

又曰傷寒不大便六七日頭痛有熱者與承氣湯其小便清者知不在裏仍在表也當須發汗若頭痛者必衄屬桂枝湯常氏云疑其誤也設須發汗當用麻黃湯不然用桂枝麻黃各半湯取小小汗出而已雍曰亦當分有汗無汗二證而用湯也其小便清者知

不在裏故不用承氣湯而用二湯也

又曰下利腹脹滿身體疼痛者先溫其裏乃攻其表
溫裏宜四逆湯攻表宜桂枝湯雍曰下利裏證身疼
痛表證也

又曰下利後身疼痛清便自調者急當救表宜桂枝
湯雍曰可與前證相續

又曰太陽病頭痛發熱汗出惡風者屬桂枝湯

又曰太陽中風陽浮而陰弱陽浮者熱自發陰弱者
汗自出嗇嗇惡寒淅淅惡風翕翕發熱鼻鳴乾嘔者

屬桂枝湯證

又曰太陽病發熱汗出者此爲榮弱衛強故使汗出欲救邪風宜桂枝湯證雍曰榮弱者自和也衛強者風邪乘之也欲逐風邪須令桂枝入衛則不動榮也又曰太陽病下之後其氣上衝者屬桂枝湯脈經云氣不上衝者不可與服

又曰太陽病初服桂枝湯反煩不解者先刺風池風府卻與桂枝湯則愈龐氏曰風池足少陽之經陽維之會不鍼天柱而取風池者陽維維諸陽巨陽爲諸

陽主氣故也

又曰燒鍼令其汗鍼處被寒核起而赤者必發奔豚氣從小腹上搶心者灸其核上各一壯與桂枝加桂湯

又曰太陽病項背強几几無汗惡風者葛根湯主之
又曰太陽與陽明合病必自下利不嘔者屬葛根湯
又曰太陽與陽明合病不下利但嘔者宜葛根加半夏湯

又曰太陽病桂枝證醫反下之利遂不止脈促者表

未解也喘而汗出者宜葛根黃芩黃連湯

又曰太陽病頭痛發熱身疼腰痛骨節疼痛惡風無汗而喘者屬麻黃證龐氏云身疼痛骨節煩疼凡脈浮數或脈浮緊無汗小便不數病雖十餘日尚宜麻黃湯也

又曰太陽與陽明合病喘而胸滿者不可下也屬麻黃湯證

又曰太陽中風脈浮緊發熱惡寒身疼痛不汗出而煩躁或頭痛者大青龍湯主之若脈微弱汗出惡風

者不可服之服之則厥逆筋惕肉瞤此爲逆也

又曰傷寒脈浮緩身不疼但重者有輕時無少陰證者可與大青龍湯發之雍曰大青龍湯惟有此二證最爲難識故世醫多不能辨用之亦多誤也前曰太陽中風脈浮緊者此卽中風見寒脈也後曰太陽傷寒脈浮緩者此則傷寒見風脈也龐氏曰似桂枝證反無汗而脈緊似麻黃湯證反身不疼而脈緩此爲大青龍證其言皆不難知其要則在太陽中風脈浮緊太陽傷寒脈浮緩而已然大青龍發汗過於麻黃

湯遠甚如中風見寒脈汗不出者尙可用設或中風見寒脈自汗出者安敢更用青龍湯發表故仲景又曰若脈微弱汗出惡風者不可服之服之則厥逆筋惕肉瞤此爲逆也蓋謂服之則汗漏不已至於亡陽之極則必厥逆而生筋惕肉瞤之證不可治也世醫所以多誤用者正謂此如是則大青龍之證又當於中風見寒脈之中再分有汗無汗作爲兩證則大青龍當有三證其兩證無汗者可服大青龍其一證有汗者不可服也有汗一證旣不可服大青龍湯則有

證無藥矣自仲景之後古今未嘗議此一證所以後人多誤雍謂此一證當用桂枝麻黃各半湯仲景本以此湯治發熱惡寒形如瘧者且瘧之發寒本因傷於寒瘧之發熱本因傷於風惟瘧具風寒二證故與大青龍其源相似但恐病重藥輕雍又妄意大青龍三證皆可代用惟無汗者微加麻黃有汗者微減麻黃用之則尤善雖曰藥輕其實對證又無誤用之失不猶愈乎龐氏云桂枝石膏湯夏至後可代桂枝證用之更加麻黃去節半兩代麻黃湯青龍湯用之然

言無少陰證可用者三陰俱不可發汗獨少陰爲甚也

又曰傷寒表不解心下有水氣乾嘔發熱而欬或渴或利或噎或小便不利少腹滿或喘者宜小青龍湯又曰傷寒心下有水氣欬而微喘發熱不渴服湯已渴者此寒去欲解也屬小青龍湯證

又曰陽明中風脈弦浮大而短氣腹都滿脇下及心痛久按之氣不通鼻乾不得汗嗜臥一身及目悉黃小便難有潮熱時時噦耳前後腫刺之小差外不解

病過十日脈續浮者與小柴胡湯脈但浮無餘證者與麻黃湯若不溺腹滿加噦者不治雍曰發黃不溺而噦者宜多服茵陳五苓散大通小便若無表證脈不浮則十棗湯下之

又曰太陽病十日以去脈浮細而嗜臥者外已解也設胸滿脇痛者與小柴胡湯脈但浮者與麻黃湯

又曰中風往來寒熱傷寒五六日以後胸脇苦滿默默不欲飲食心煩喜嘔或胸中煩而不嘔或渴或腹中痛或脇下痞鞭或心下悸小便不利或不渴身有

微熱或欬者屬小柴胡湯

又曰傷寒四五日身熱惡風頸項強脇下滿手足溫而渴者屬小柴胡湯證

又曰傷寒六七日發熱微惡寒支節煩疼微嘔心下支結外證未去者柴胡桂枝湯主之

又曰少陰病得之二三日麻黃附子甘草湯微發汗以二三日無裏證故微發汗也雍曰少陰病不可汗惟此一證可微發也

又曰脈浮小便不利微熱消渴者與五苓散利小便

發汗

又曰太陽病下後脈促胸滿者桂枝去芍藥湯主之
龐氏曰芍藥味酸脈促胸滿成結胸故去芍藥全用
甘辛發散毒氣也

又曰服桂枝湯或下之仍頭痛項強翕翕發熱無汗
心下滿微痛小便不利者桂枝去桂加茯苓白朮湯
主之

龐氏曰傷寒三日後與諸湯不差脈勢如故陽氣猶
在經絡未入藏府宜桂枝石膏湯此湯可夏至後代

桂枝湯證用之若加麻黃半兩可代麻黃青龍用之
又曰傷寒療治四五日不差身體毒熱面赤者葛根
龍膽湯主之兼治陽毒風溫

又曰凡發散以辛甘爲主復用此苦藥何也辛甘者
折陰氣而助陽氣也今熱盛於表故加苦以發之素
問云熱淫於內以苦發之是也

又曰時行熱病六七日未得汗脈洪大或數面目赤
身體大熱煩躁狂語欲走大渴甚又五六日以上不
解熱在胃中口噤不能言爲壞傷寒醫所不能治如

已死人或精魄已竭心下纔暖發開其口灌藥下咽
卽活兼治陽毒奴丸

活人書名
黑奴丸

又蒸法曰傷寒連服發汗湯七八劑汗不出者死如
中風法蒸之使溫熱之氣外迎無不得汗也古今用
效薪火燒地良久去火掃地以水洒之取蠶沙柏桃
荊葉糠及麥麩皆可用和鋪燒地上可側手厚鋪席
令人臥席上溫覆之熱月只可夾被覆其汗立出候
周身至腳心皆濺濺乃用溫粉撲止移之上牀卽愈
如無蠶沙則用麥麩之類亦得雍曰此卽千金所載

陳廩邱法已見首篇敘論之後不厭重出也

又曰傷寒差後有不了了證者謂至十日或半月二十日終不惺惺常昏沈似失精神言語錯繆或無寒熱有似鬼祟或朝夕潮熱頰赤或有寒熱如瘧狀此乃發汗不盡餘毒氣在心胞絡間所致也宜知母麻黃湯

又曰太陽病下之後氣上衝其脈必浮可依證發汗不與發汗則成結胸也凡發汗脈浮大雖大便祕小便少者可發汗而解也

又曰當汗不汗諸毛孔閉塞悶絕而死

八

仲景傷寒補亡論卷第八終

仲景傷寒補亡論卷第九

河南郭雍撰次

汗後四十四條 不可吐五條

可吐十條

汗後四十四條

仲景曰二陽併病太陽初得病時發其汗汗先出不徹因轉屬陽明續自微汗出不惡寒若太陽病證不罷者不可下下之爲逆如此可小發汗設面色緣緣正赤者陽氣怫鬱在表當解之熏之若發汗不徹不

足言陽氣怫鬱不得越當汗不汗其人煩躁不知痛處乍在腹中乍在四肢按之不可得其人短氣但坐以汗出不徹故也更發汗則愈何以知汗出不徹以脈濇故知之常氏云可柴胡桂枝湯龐氏云用麻黃湯

又曰未持脈時又手冒心師因教試令欬而不欬者此兩耳聾無聞也所以然者以重發汗虛故如此常氏云可小柴胡湯雍曰先宜小建中湯

又曰發汗後飲水多必喘以水灌之亦喘常氏云治

喘可麻黃杏子石膏湯雍曰傷水者五苓散鈞厓曰宜小青

龍湯

又曰發汗後水藥不得入口爲逆若更發汗必吐下不止常氏云可小半夏加橘皮湯雍曰可類要四味橘皮湯

又曰陽明病本自汗出醫更重發汗病已差尙微煩不了了者此必大便鞭故也以亡津液胃中乾燥故令大便鞭當問其小便日幾行若本小便日三四行今日再行故知大便不久出今爲小便數少以津液

當還入胃中故知不久必大便也常氏云可小柴胡湯雍曰小便少者津液入胃則不須服藥也

又曰發汗多若重發汗者亡其陽讖語脈短者死脈自和者不死常氏云可小柴胡湯

又曰傷寒發汗已身目爲黃所以然者以寒溼在裏不解故也以爲不可下也於寒溼中求之常氏云可五苓散雍曰黃芪加茵陳湯

又曰病人有寒復發汗胃中冷必吐衄常氏云可理中丸烏梅丸

又曰太陽病發汗遂漏不止其人惡風小便難四肢
微急難以屈伸者屬桂枝加附子湯龐氏曰小便難
爲有津液可作汗若小便數不可誤認爲桂枝證也
又曰服桂枝湯大汗出脈洪大者與桂枝湯如前法
謂刺風池風府若形似瘧一日再三發者汗出必解屬桂枝
二麻黃一湯

又曰服桂枝湯大汗出後大煩渴不解脈洪大者屬
白虎加人參湯

又曰傷寒脈浮自汗出小便數心煩微惡寒腳攣急

反與桂枝湯欲攻其表此誤也得之便厥咽中乾煩躁吐逆者作甘草乾薑湯以復其陽若厥愈足溫者更作芍藥甘草湯與之其腳卽伸若胃氣不和讖語者少與調胃承氣湯

又曰若重發汗復加燒鍼者與四逆湯雍曰此證首尾都無四逆證恐是字誤今詳重發汗復加燒鍼恐是火劫亡陽驚狂者則當與桂枝去芍藥加蜀漆牡蠣龍骨救逆湯若止是火逆因燒鍼煩躁則當與桂枝甘草龍骨牡蠣湯亦救逆也故恐四逆本是救逆

湯字校正日誤書入四逆一方也

又曰傷寒發汗已解半日許復煩脈浮數與桂枝湯
又曰發汗後身疼痛脈沈遲者屬桂枝加芍藥生薑
各一兩人參三兩新加湯

又曰發汗後不可更行桂枝湯汗出而喘無大熱者
可與麻黃杏子甘草石膏湯

又曰發汗過多其人叉手自冒心心下悸欲得按者
屬桂枝甘草湯

又曰發汗後其人臍下悸者欲作奔豚屬茯苓桂枝

甘草大棗湯

又曰發汗後腹脹滿者屬厚朴生薑半夏甘草人參湯

又曰發汗後病不解反惡寒者虛故也屬芍藥甘草附子湯

又曰發汗後惡寒者虛故也不惡寒但熱者實也當和胃氣屬調胃承氣湯脈經作小承氣湯仍二證通爲一

又曰太陽病發汗後大汗出胃中乾煩躁不得眠欲

得飲水者少少與飲之令胃中和自愈若脈浮小便不利微熱消渴者屬五苓散

又曰發汗已脈浮數煩渴者屬五苓散

又曰傷寒汗出而渴者宜五苓散不渴者屬茯苓甘草湯

又曰太陽病發汗汗出不解其人仍發熱心下悸頭眩身瞤動振振欲墜地屬真武湯

又曰傷寒汗出解之後胃中不和心下痞鞭乾噫食鼻脇下有水氣腹中雷鳴下利者屬生薑瀉心湯

又曰傷寒發熱汗出不解心下痞鞭嘔吐而下利者屬大柴胡湯

又曰陽明病自汗出若發汗後小便自利者此爲津液內竭雖鞭不可攻之須自欲大便宜蜜煎導而通之若土瓜根大豬膽汁皆可爲導

又曰太陽病三日發汗不解蒸蒸發熱者屬胃也宜調胃承氣湯

又曰大汗出熱不去內拘急四肢疼又下利厥逆而惡寒者屬四逆湯也

又曰發汗後不解腹滿痛者急下之宜大承氣湯
又曰發汗多亡陽譏語者不可下與柴胡桂枝湯和
其榮衛以通津液後自愈

問曰古所謂陰陽交者何也素問三十三篇曰有病
溫者汗出輒復熱而脈躁疾不爲汗衰狂言不能食
病名陰陽交交者死也岐伯曰人所以汗出者皆生
於穀穀生於精今邪氣交爭於骨肉而得汗者是邪
卻而精勝也精勝則當能食而不復熱復熱者邪氣
也汗出者精氣也今汗出而輒復熱者是邪勝也不

能食者精無俾也汗而熱留者其壽可立而傾也

問曰素問言汗出而脈尙躁盛者死何也雍曰此則陰陽交也靈樞二十三篇曰熱病已得汗而脈尙躁盛此陰脈之極也死其得汗而脈靜者生熱病脈盛躁而不得汗者此陽脈之極也死脈盛躁得汗靜者生

又問曰何以謂之交也雍曰陰極則交陽極則交陰交則爭而亂矣故不可極也有生者何如曰靜則生交則死也陰脈脈靜陽脈人靜皆生之證也

問曰何以謂之盛躁雍曰靈樞九篇所謂人迎一盛二盛三盛脈口一盛二盛三盛者此之謂盛也一盛而躁二盛而躁三盛而躁此之謂躁也極者何也人迎脈口四盛皆爲極矣人迎四盛名曰溢陽爲外格脈口四盛名曰溢陰爲內關內關外格死不治卽陰陽交也人迎不爲衰陽交也脈口不爲衰陰交也脈口卽氣口也

問曰有躁而不盛者何如雍曰靈樞二十三篇曰熱病已得汗出而脈尙躁喘且復熱勿膚刺喘甚者死

是也此雖不盛而喘亦非其宜故喘甚則死也

問曰有煩滿不爲汗解者何也雍曰素問三十三篇
曰有熱病身熱汗出煩滿不爲汗解岐伯曰汗出而
身熱者風也汗出而煩滿不解者厥也病名曰風厥
巨陽主氣故先受邪少陰與其爲表裏也得熱則上
從之從之則厥也治之者表裏刺之飲之湯劑雍曰
仲景言傷寒感異氣變爲壞病如風溫溫毒之類則
此風厥亦其類也宜刺太谿崑崙服茯苓桂枝甘草
大棗湯

問曰汗後脈洪者何也雍曰洪大者非不爲汗衰衰而未得盡去非若躁盛全不爲汗衰也故仲景以爲可治之疾然洪大亦有輕重如一盛二盛之說若洪大而無他證者刺風池風府卻與桂枝湯是也洪大而大煩渴不解者白虎加人參湯除其裏熱也其餘逐證不同者皆依仲景之法治之

問曰汗後飲水多者必喘而治熱病飲之寒水何也雍曰素問三十二篇曰諸治熱病以飲之寒水乃刺之必寒衣之居止寒處身寒而止也此謂治五藏熱

病各刺手足諸經證治與傷寒有異詳刺熱終篇可見故傷寒不可多飲水

問曰素問言熱病已愈時有所遺何也雍曰此謂勞復非汗後證勞復本證詳之

問曰汗後之證或治或不治何也雍曰汗後之證多矣動於脈者重見於證者輕如汗後脈盛躁是邪之曾不退也脈洪大者刺之如汗後尙發熱心下痞喘滿吐利小便或利或不利之類皆正病已衰餘毒未退依仲景隨證治之則愈

千金翼曰發汗後身熱又重發其汗胃中虛冷必反吐也雍曰宜小建中湯四味橘皮湯

又曰發汗後重發其汗亡陽讖語其脈反和者不死服桂枝湯汗出大煩渴不解若脈洪大者與白虎湯不可吐五條

仲景曰太陽病當惡寒發熱今自汗出反不惡寒發熱關上脈細數者以醫吐之過也若得病一二日吐之腹中飢口不能食三四日吐之者不喜糜粥欲飲冷食朝食暮吐以醫吐之所致也此爲小逆常氏云

可小半夏加橘皮湯溫中湯

又曰太陽病吐之者但太陽病當惡寒今反不惡寒不欲近衣者此爲吐之內煩也常氏云可金匱竹皮湯竹葉石膏湯雍曰大橘皮湯四味橘皮湯皆可服又曰少陰病飲食入口則吐心中溫溫欲吐復不能吐始得之手足寒脈弦遲者此胸中實不可下也當吐之若膈上有寒飲乾嘔者不可吐也急溫之常氏云可小半夏加橘皮湯溫中湯

又曰諸四逆厥者不可吐之虛家亦然龐氏曰諸四

逆脈微弱細或弦遲雖中滿悶不可吐宜橘皮湯枳實散又曰虛家當吐而不敢吐者宜以枳實散壓氣毒痰水過日毒氣入胃乃可微下之

龐氏曰不可吐而強之吐氣築心則死矣

可吐十條

仲景曰大法春宜吐

又曰凡用吐湯中病則止不必盡劑也

又曰病如桂枝證頭不痛項不强寸脈微浮胸中痞鞭氣上衝咽喉不得息者此爲胸有寒當吐之

一云此以

丙有欠癆 常氏云可瓜蒂散
當吐之

又曰病胸上諸實一作云胸中鬱鬱而痛不能食欲使

人按之而反有涎唾一作濁唾下利日十餘行其脈反遲

寸口脈微滑此可吐之吐之利則止常氏云可瓜蒂

散

又曰宿食在上脘者當吐之常氏云可瓜蒂散

又曰少陰病飲食入口則吐心中温温欲吐復不能

吐者宜吐之常氏云宜瓜蒂散

又曰病人手足厥冷脈乍結一作緊以客氣一作邪結在胸

中心下滿而煩欲食不能食者病在胸中當吐之常
氏云可瓜蒂散

龐氏云胸膈痞悶痰壅塞礙脈得浮滑並宜瓜蒂散
吐之產後六七日內下瀉諸藥不效得此脈者吐之
瀉立止

千金傷寒論曰得病無熱但狂言煩躁不安精采言
語不與人相主當者勿以火迫之但以豬苓散一方
寸匙服之當逼與新水一升若二升強飲之令以物
刺喉中吐之病隨吐愈若不能吐者勿強與之水水

停則結心下也當更以餘藥吐之若此病輩不將豬
苓散吐解之者其死殆速有水飲膈實者皆難治此
三死一生也雍曰心下停水難治之疾須早吐也
病源曰寒多熱少可吐者此謂痰多也治瘧亦如之

仲景傷寒補亡論卷第九終